

इब्राहीमक काँथ

अब्राम बुलाई जां 1

(उत्पत्ति १२:१-७)

ऑब यैक भौत सालोंक बाद एक मैस छी, वीक नाम अब्राम छी। परमेश्वरल उधै कौ, "तु आपण बिरादरी और यौ देश कै छोड़िबेर उ देशक तरफ जा, जो मी तुकै दिखूंल। मी त्यर नाम कै भौत उंच बणूंल और त्यर जरियल सब मैसों कै आशीश मिलेलि। जो मैस तुकै आशीश द्याल मी उनुकै आशीश द्यूल, और जो तुकै फिटकार द्याल, उनुकै मी फिटकार द्यूल। और यैक अलावा धरतिक हरेक परिवार त्यर जरियल आशीश पाल।"

जब प्रभु परमेश्वरक हुकुमल अब्राम हारान देश बे जाणौछी, उ बखत उ पचहत्तर सालक छी। उ आपणि स्यैणि सारै, भतिज लूत, दास, जानवरों और आपण सब समान कै लिबेर जानै-जानै कनान देश मिं पुजौ।

हिटन-हिटनै उं शकेम नामक जॉग मिं पुजी। उ बखत उ देश मिं कनानी जातिक मैस रुंछी। तब प्रभु परमेश्वरल अब्रामक पास परगट हबेर कौ, "मी यौ देश त्यर वंश कै द्यूल।" तब अब्रामल परमेश्वरक लिजी एक वेदी बणैबेर वीक अराधना करी।

अब्राम और लूतक अलग हुण

(उत्पत्ति १३:२, ५-१८)

अब्राम भौत अमीर मैस छी। वीक पास भौत सुन-चांदि और जानवर छी। अब्रामक भतिज लूत जो वीक दगाड़ छी, वीक पास लै भौत जानवर छी। उं

1 इब्राहीमक पैली नाम अब्राम छु

द्विनोंक इतुक जादेक जानवर छी कि उनार जानवरोंक एक दगाड़ चरणक लिजी घा पुर नि पड़छी। यौ कारणल उं द्विनोंक ग्वावोंक बीच मिं झगड़ हुंछी। तब अब्रामल लूत धै कौ, "आपस मिं हमर झगड़ नि हुण चैन, किलैकि हम यक्कै छूं। तब लै हमुकै अलग-अलग तरफ जाण चै। तुकै जो जाँग ठिक लागुं, तु उ तरफ जा, और मी वीक दुसर तरफ न्है जूल।"

सब तरफ चाणक बाद लूतल यरदनक घाटिक तवों जाँग पसंद करी, किलैकि उ प्रभु परमेश्वरक बगीचक चारि उपजाउ छी। यौ कारणल उ अलग हबेर वां रुण लागौ। यांक नजिकक नगर सदोमॉक मैस भौत खराब छी, उं हमेशा प्रभु परमेश्वरक खिलाफ पाप करछी।

तब लूतक जाणक बाद प्रभु परमेश्वरल अब्राम धै कौ, "पुरब, पश्चिम, उत्तर और दक्षिण आपण चारों तरफ चा। यौ सारि जाँग जकै तु देखणैछै



लूत और इब्राहीम अलग जाणकि बात करणई।

मी तुकै और त्यार वंशजों कैं दिंनू। यौ हमेशाक लिजी तुमर छु। मी त्यार वंशजों कैं धरतिक धूलक समान अनगिनत बणूल। अगर क्वे मैस धरतिक धूलक गिनती करि सको, तब उ त्यर वंशजों कैं लै गिण सकल। ऐल उठ, और इथां-उथां सॉर जाँग मिं हिटबेर उकै देखि ले, किलैकि मी यौ तुकै दिंनू।"

तब अब्रामल आपण तम्बू वांबे हटाई और उ हेब्रोन नगरक नजिक रुण लागौ। और वां अब्रामल प्रभु परमेश्वरक अराधना करणक लिजी फिर एक वेदी बणै।

परमेश्वर अब्रामक दगाड़ वैद करनी

(उत्पत्ति १५:१-७, १३-१५)

परमेश्वरल फिर अब्रामक सामण परगट हबेर कौ, "अब्राम, तु डरिये झन, मी तेरि हिफाजत करिबेर तेरि भलाइ जरूड करुल।" पर अब्रामल कौ, "हे प्रभु परमेश्वर, यस क्वे लै भलाइ न्है, जो तुम म्यर लिजी करला और वील मी खुशि है जूल, किलैकि म्यर एक लै च्यल न्है। और यौ कारणल म्यर

नौकर एलीएजर म्यर वारिस ह्वल, किलैकि त्वील मिक्के च्यल नि दी रॉख।" लेकिन प्रभु परमेश्वरल अब्राम धें कौ, "यस न्है! त्यर च्यल जरूड ह्वल और वी त्यर वारिस बणौल।"

वीक बाद परमेश्वरल अब्राम कें भ्यार ली जैबेर कौ, "के तु यौ अगाशक तारों कें गिण सकछै? नि गिण सकनै। अधिल के त्यर परिवार लै यस्से ह्वल।" अब्रामल परमेश्वरक वैद मिं भरौस करौ, और यौ भरौसक कारणल उ परमेश्वरक नजर मिं एक धर्मी मैस ठैरौ।

परमेश्वरल अब्राम धें कौ, "मी प्रभु परमेश्वर छूं। मील तुकें त्यर देश बे भ्यार निकालौ, और ऐल मी यौ देश तुकें दिंनू। लेकिन यौ पुर हुण है पैली, त्यार वंशक मैस एक पराइ देश मिं जॉल और उनर गुलाम हवाल। और वांक रॉज उनुकें चार सौ साल तलक गुलाम बणौबेर उनर दगाड़ भौत खराब बरताव करनै रौल। लेकिन मी उं मैसों कें सजा द्यूल, और जब त्यार वंशांक मैस वापिस फिर यौ देश मिं आल, उं भौत धन-दौलत लिबेर आल। लेकिन तु भौत बखत तलक शांतिल ज्यून रौलै और आपण पुरि बाल खैबेर मरलै।"

इश्माएलक जनम

(उत्पत्ति १६)

सारै जो अब्रामकि स्यैणि छी, वीक क्वे नॉनतिन नि छी। वीक पास एक मिस्री दासी छी जैक नाम हाजिरा छी। सारैल आपण बैग धें कौ, "देखो, प्रभु परमेश्वरल मिक्के नॉनतिन नि दी रॉख। यैक लिजी तुम मेरि दासी बे नॉनतिन पैद करो। और मी उ नॉनतिन कें आपण नॉनतिन समझि ल्यूल।" तब अब्रामल आपण स्यैणिक कौय मानौ।

यौ तब हौ जब अब्राम दस साल बे कनान देश मिं रुणौछी। जब अब्राम बे हाजिरा अड-भारि भै, तब उकें यौ बातक भौतै घमण्ड हौ, और आँब उ आपण मालकिन कें ह्याव समझण भै गेछी। तब सारैल आपण बैग धें कौ, "मेरि दासी मिक्के ह्याव समझणै और यैक लिजी मी तुमुकें कसूरदार माननू, किलैकि मीलै उ तुमुकें देखी। उ अड-भारि है और आँब उ समझण लागी कि उ मि हबेर भलि छु। मी चानू कि परमेश्वर यौ बातक ठिक-ठिक फैसॉल करो।" तब अब्रामल सारै धें कौ, "तु हाजिराकि मालकिन छै, और उ तेरि दासी छु। आँब जस तु चांछै, उस कर।" तब सारैल हाजिरा कें रोज-रोज इदुक जादे परेशान करौ कि हाजिरा भाजि गई।

जब हाजिरा शूर जाणी बॉटक रेगिस्तानक फेर मिं पाणिक कुंवक सामणी भै रैछी, तब परमेश्वरक स्वर्गदूतल उकै देखिबेर कौ, "ओ हाजिरा, सारैक दासी, तु यां किलै ऐ रै छै, और कां जाणैछै?" हाजिराल उधैं कौ, "मी आपण मालकिन सारै बे भोजणयूं।" स्वर्गदूतल उधैं कौ, "तु आपण मालकिनक घर वापिस जा और वीक कौयू मान। त्यर वंश इदुक जादेक है जॉल कि उनेरि गिनती नि करी जै सको। और त्यर जो नॉनतिन ऐल पैद हवल, तु वीक नाम इश्माएल धरिये, किलैकि प्रभु परमेश्वरल त्यर दुःख सुण राँखौ।² " उ एक जंगली गधाक चारि हवल, जो कै कै लै बश मिं नि रुन। उ सबोक और सब वीक खिलाफ हवाल।"

उधैं बात करणक बाद हाजिरा समझी कि अरे, यौ तो परमेश्वर छी! तब वील अजकिबेर कौ, "मील परमेश्वर कै देखौ जो मेरि देख-रेख करनी।" और तब वील परमेश्वरक नाम "ऐल-रौय" धरौ, जैक मतलब छु, "परमेश्वर मेरि देख-रेख करनी।"

वीक बाद हाजिराल अब्रामक घर वापिस जैबेर वीक च्यल कै जनम दे। और तब अब्रामल उ च्यलक नाम इश्माएल धरौ। उ बखत अब्राम छियासी सालक छी।

अब्राम बे इब्राहीम

(उत्पत्ति १७:१-६)

वीक बाद जब अब्राम निन्यानबे सालक हौ, तब प्रभु परमेश्वरल वीक दगाड़ फिर बात करिबेर कौ, "मी परमेश्वर छूं, जो सबों है सामर्थी छूं। म्यर कौय मानिबेर तुम भल बॉट मिं हिटो। मी आपण और त्यर बीच करी वैद कै पुर करुल, और त्यर वंश भौत जादे हवल।" यौ सुणिबेर अब्रामल आपण मूख धरतिक तरफ चौड़ करौ। फिर परमेश्वरल कौ, "देख, मी त्यर दगाड़ यौ वैद करनू कि मी तुकै भौतै देशोक कुल पिता बणूंल। और मी त्यर नाम कै बदउंनू। आज बे त्यर नाम "अब्राम" नै, पर "इब्राहीम" हवल। किलैकि मील तुकै भौत देशोक कुल पिता बणै है। यैक लिजी मील तुकै यौ नाम दे। त्यर वंश इतुक जादे हवल कि उं भौत देश बणल। और उनुमिं बे अलग-अलग राँज लै पैद हवाल!"

² इश्माएलक अर्थ छु - परमेश्वर सुणुं।

वैदक निशाण

(उत्पत्ति १७:७-२७)

परमेश्वरल इब्राहीम धैँ फिर कौ, "मी आपण और त्यर दगाड़ एक वैद करनू जो तु और तेरि बाद ऊणिवालि सबै पिढियोंक दगाड़ हमेशा तलक रौल, कि मी त्यर और उनर परमेश्वर रूँल। ऐल तु यां एक परदेशीक चारि घुमणौछै, पर मी यौ देश तु और त्यर वंशजों कैँ हमेशाक लिजी द्यूँल। तु और त्यर वंश म्यर यौ वैदक पालन हमेशा करिया। यौ दिखूणक लिजी, तुम सब बैग मैँसॉल आपण-आपण खतना करवूण छु। हरेक बैग मैँस और नॉनतिनोंल आपण गुप्तांगक खाल कैँ यैक लिजी काँटण छु, कि जो वैद परमेश्वरल म्यर दगाड़ करि राँखौ, मी उकैँ माननू।

आज बे जब तुमर या तुमार दासोंक परिवार मिं क्वे लै च्यल पैद ह्वल, तब आठ दिनक बाद तुम वीक खतना करिया। और इसिक तुम आपण घर मिं पैद हईँ और मोल खरीदीं सब नौकरोँक लै जरूड़ खतना करिया। तुमर आड मिं यौ खतना हमेशा तलक म्यर वैदक निशाण रौल। और जो मैँस आपण खतना नि करवाँल, उकैँ तुमर बिरादरी बे अलग करी जाँल, किलैकि वील म्यर वैद कैँ टोड़ौ।"

परमेश्वरल इब्राहीम धैँ फिर कौ, "मी सारै कैँ जो तेरि स्यैणि छु, उकैँ लै दुसर नईँ नाम द्यूँल। वीक नाम सारा ह्वल। और मी उकैँ च्यलक रूप मिं आशीश द्यूँल और तु वीक बौज्यू ह्वलै। और सारा भौत नईँ देशोंक कुल इज ह्वेलि, और उ बे भौत देशोंक रॉज पैद हवाल।"

इब्राहीमल परमेश्वरक सामण आपण रूवर चौड़ करिबेर धरति तलक लगा। और आपण मन मिं हसबेर कूण लागौ, "मी आपण लिजी च्यल पैद नि करि सकन, किलैकि मी सौ सालक बुड़ छु। और सारा लै नॉनतिनों कैँ पैद नि करि सकनी किलैकि उ नब्बे सालैकि बुड़ि हैँगे।" यैक लिजी इब्राहीमल परमेश्वर धैँ कौ, "प्रभु, इश्माएल मिं तुमेरि किरपा हमेशा रवो।" लेकिन परमेश्वरल कौ, "सारा त्यर च्यल कैँ जरूड़ जनम देलि और तु वीक नाम इसहाक धरिये। और मील जो वैद त्यर दगाड़ करौ, वीक दगाड़ लै करुँल, और उ वीक वंशजोंक दगाड़ लै हमेशा तलक रौल। लेकिन त्वील मिधैँ इश्माएलक बारि मिं पुछौ, मील तेरि बात सुणी। मी उकैँ लै आशीश द्यूँल। वीक भौत नॉनतिन हवाल और उ बार राजकुमारोंक कुल पिता ह्वल। मी उ बे एक ठुल जाति बणूँल। लेकिन मी आपण वैद इसहाकक दगाड़ करुँल,

जकै सारा अधिल साल मिं जनम देलि।" और इब्राहीम धैं बात करणक बाद परमेश्वर जानै रौ।

किलैकि परमेश्वरल उधैं कै रॉखछी कि तु आपण खानदानोंक सब बैग और च्यालोंक खतना कराये, यैक लिजी इब्राहीमल इश्माएल और आपण घर मिं पैद हई और मोल लेई सब दासों कै एक दगाड़ बुला और आपण दगाड़ उनर लै लिंगक खाल काटिबेर खतना करौ। जब इब्राहीमक खतना हौ तब उ निन्यानबे सालक छी। और वीक च्यल इश्माएल तेर सालक छी।

परमेश्वर इब्राहीमक घर आई

(उत्पत्ति १८:१-१५)

थ्वाड़ बखत बाद परमेश्वर फिर इब्राहीमक पास परगट हई। यौ तब हौ जब इब्राहीम मग्रे मिं ठुल बांजक बोटोंक पास रंछी। उ दोफरिक बखत मिं आपण टैन्टक भ्यार बे बैठि रौछी, तब वील तीन मैसों कै उण देखौ। वील उनर सामण जैबेर कौ, "ओहो महाराँज, तुम हिटिबेर म्यर गरीब खॉण मिं थ्वाड़ ऐराम करि लियो। मी तुमर हात-खुट ध्वेणक लिजी पाणि ल्युनू, थ्वाड़ खॉणक इंतजाम करनू और तुमुल जां लै जाण छु खॉण खॉणक बाद जाया, तब तलक तुम यां स्योव मिं ऐराम करो।" उनुल कौ, "ठिक छु।

इब्राहीम जल्दी आपण टैन्ट भितेर गो, और सारा धैं कौ, "झटपट तीन पैसेरि पिसूवाक र्वाट पका।" और इब्राहीमल जल्दी-जल्दी जैबेर आपण जानवरों मिं बे एक भलौ जानवर लिबेर आपण नौकर कै दिबेर कौ, "यकै झट्ट काटिबेर पकाओ।"

जब खॉण पाकौ तब इब्राहीमल उ तीनों कै शिकार, र्वाट, दै, और दूध दे। और खॉण खान-खानै उनुल इब्राहीम धैं पुछौ, "तेरि स्यैणि सारा कां छु?" वील कौ, "टैन्ट भितेर छु।" वीक बाद उनुमिं बे एकल कौ, "आज बे ठिक एक सालक बाद मी फिर यां ऊंल और उ बखत तलक साराक एक च्यल है रौल।" इब्राहीम



इब्राहीमक ड्यार मिं परमेश्वरक तीन दूत

और सारा द्विवै बुड़ है ग्याछी और ऑब सारा आपण नॉनतिन पैद नि करि सकछी। सारा यौ बात सुणिबेर हसि और उ मन-मनै कूण लागी, "मी और म्यर घरवाव द्विवै बुड़ छूं और नॉनतिन कै जनम दिणैक ताकत लै म्यर पास नहैं। के फिर लै यस ह्वला?"

तब उ मैसल जो सांचि मिं परमेश्वर छी कौ, "साराल हसिबेर किलै कौ, "मी बुड़ि छूं और नॉनतिन कै जनम नि दी सकन! किलै प्रभु परमेश्वरक लिजी के मुशिकल छा? नहैं, मी जानू और फिर दुबार अधिल साल तुमर पास ऊंल। उ बखत तलक तेरि स्यैणि च्यल कै जनम दी रॉखेलि।" पर साराल डरक मारी कौ, "मी नि हस।" लेकिन प्रभु परमेश्वरल कौ, "ना, तु हसि तो छै।"

परमेश्वरक दगाड़ इब्राहीमक सौद

(उत्पत्ति १८:१६-३३)

खॉण खॉणक बाद उं उठिबेर सदोम नगरक तरफ गेई। और इब्राहीम उनुकै थवाड़ दूर तलक पुजूणक लिजी गो। जब उं एक उंच जॉग मिं पुजीं, जांबे उं सदोम नगर कै देखि सकछी, तब प्रभु परमेश्वरल आपण मन मिं सोचौ, "के मी इब्राहीम कै उ बात बतै दिंनू जो ऑब मी करुंल? इब्राहीम एक ठुल और मजबूत देशक कुल पिता बणि जॉल। और यैक जरियल सॉर धरतिक मैसों कै आशीश मिलेलि। मील यैक लिजी उकै अलग करौ, कि उ आपण नॉनतिनों कै सच्चाई और इमानदारिल जिन्दगी बितूणक लिजी बतै सको, जस मील उकै बतै रॉखछी। तब मी आपण करी वैद कै उनर दगाड़ पुर करुंल।"

यैक लिजी प्रभु परमेश्वरल इब्राहीम धै कौ, "मील यौ बात भौत बार सुण है कि सदोम और गमोरा नगरक मैस भौत खराब छन। यौ बातक बारि मिं पत्त करणक लिजी मी आपण दूतों कै वां भेजनू। वीक बाद देखुंल कि उनुकै नांश करण छु या नि करण।"

तब दुसॉर द्वी मैस, जो परमेश्वरक दूत छी, सदोम नगरक तरफ जानै रई। लेकिन प्रभु परमेश्वर इब्राहीमक दगाड़ वां ठाड़ रई।

तब इब्राहीमल परमेश्वर धै कौ, "हे प्रभु, के तुम उ पुर नगरक मैसों कै नांश करणक लिजी सोचनाछा? अगर उ नगर मिं पचास धर्मी मैस ह्वला, के तुम तब लै उ नगर कै नांश करि द्यला? के तुम उ पचास धर्मी मैसोंक लिजी उ नगर कै नि बचाला? यौ पक्कि बात छु, कि तुम उ नगर कै जरूड़

बचाला। अगर यस नि ह्वल, तब अधर्मी और धर्मी सबों कैँ एक जसि सजा मिलेलि। पर तुम पुर धरतिक न्याय करणी छा, के तुम सही न्याय नि करला?" तब प्रभु परमेश्वरल कौ, "अगर मिकैँ सदोम नगर मिं पचास धर्मी मैस लै मिलला, तब मी उ नगर कैँ नांश नि करुंल।"

तब इब्राहीमल कौ, "हे प्रभु, तुमर सामण मी केवल धूल और छारूण छूँ। फिर लै तुम मिकैँ बात कूणक मौक दियो। अगर वां पैतालिस धर्मी मैस ह्वला, तब के ह्वल? के तुम पांच कम मैसोक कारणल पुर नगर कैँ नांश करि द्यला?" तब प्रभु परमेश्वरल कौ, "अगर मिकैँ वां पैतालिस धर्मी मैस मिलला, मी उ नगर कैँ नांश नि करुंल।"

लेकिन इब्राहीमल फिर प्रभु परमेश्वर धैँ कौ, "अगर तुमुकैँ वां चालीस धर्मी मैस मिलाल, तब तुम के करला?" प्रभु परमेश्वरल कौ, "अगर मिकैँ वां चालीस धर्मी मैस लै मिलाल तब मी उ नगर कैँ नांश नि करुंल।"

तब इब्राहीमल कौ, "हे प्रभु परमेश्वर, मिकैँ माफ करिया कि मी फिर पुछनू कि अगर वां केवल तीस धर्मी मैस हवाल, तब तुम के करला?" तब उनुल कौ, "अगर मिकैँ तीस धर्मी मैस मिलाल तब मी उ नगर कैँ नांश नि करुंल।"

तब इब्राहीमल कौ, "हे प्रभु परमेश्वर, मी तुमुकैँ तकलीफ दिबेर आइ पुछनू, कि अगर वां बीस धर्मी मैस हवाल तो?" प्रभु परमेश्वरल जबाब दे, "तब मी उ नगर कैँ नांश नि करुंल।" फिर इब्राहीमल कौ, "हे प्रभु, तुम मी देखि नराज नि हया, मी फिर पुछनू कि अगर वां दस धर्मी मैस हवाल तब तुम के करला?" उनुल कौ, "तब लै मी उकैँ नांश नि करुंल।"

वीक बाद प्रभु परमेश्वरल इब्राहीम धैँ बात करण बन्द करि दे और वांबे जानै रई। और इब्राहीम लौटिबेर आपण घर आ।

सदोम-गमोरा पुर उजड़नी

(उत्पत्ति १६:१-२६)

तब ब्याव बखत परमेश्वरॉक द्वी दूत मैसक रूप मिं सदोम नगर मिं आई। जब उं सदोमक द्वार लै पुर्जी, तब वां इब्राहीमक भतिज लूत उती सामण बैठि रौछी। और वील उनुकैँ देखिबेर पैलाग करौ। और वील उनुधैँ कौ, "ओहो महारॉज, किरपा करिबेर म्यर घर हिटो। वां तुम आपण हात-खुट ध्वेबेर ऐराम करला। और रात काटिबेर राति आपण बाँट हुं जाया।" लेकिन उनुल उकैँ जबाब दे, "ना-ना, हम भ्यार बे रात बितूँल।" पर जब लूतल उनुधैँ

बार-बार कौ, तब उं वीक घर मिं आई और लूतल उनुकैं भलौ खॉण पकैबेर खवा।

वीक बाद जब उं सितण लागीं, तब उ बखतै सदोमॉक लौंड-मौंड, जवान और बुड़-खुणूल ऐबेर लूतक घर कैं चारों तरफ बे घेर दे। और उं धात लगैबेर कूण लागीं, "अबे लूत, तनुकैं भ्यार निकाल! जो आज त्यर वां ऐ रई, उं कां छिन? हम तनर दगाड़ सहवास करनू।"

यौ सुणिबेर लूत भ्यार आ और वील द्वार ढक दे।

वील उनुधैं कौ, "दौद-भुलो, मी तुमर अधिल हात जोड़नू कि तुम यस झन करिया। सुणो, म्यार द्वी अणब्यवाई चेली छिन। मी उनुकैं भ्यार ल्युनू और जस तुमुकैं ठिक लागल उस करिया, पर यौं मैसोंक दगाड़ के झन करो। किलैकि यौं म्यार पौण छन।"

लेकिन उं मैसोंल उधैं कौ, "चल हट, हमर सामण बे उथकै जा। तु यां परदेशि हबेर ऐ रौछियै, ऑब तु हमर न्याय करण चांछै? हम उं मैसोंक हबेर जादे नक त्यर दगाड़ करुंल।" उं लूत कैं धांक मारिबेर द्वार कैं टोड़णक लिजी अधिल आई। लेकिन दूतोंल जो मैस भ्यार छी, उनुकैं काँण बणै दे, और लूत कैं भितेर खींचबेर द्वार ढक दे। तब उं मैस द्वार कैं चान-चानै थॉक पड़ीं, लेकिन उनुकैं द्वार नि मिल।

तब दूतोंल लूत धैं कौ, "हम परमेश्वरक दूत छूं। उनुल हमुकैं यां सदोम और गमोरा नगरों कैं नांश करणक लिजी भेजि रॉखौ, किलैकि यांक मैसोंक पाप परमेश्वरक सामण भौत बढ गेई। यैक लिजी तु आपण नॉनतिनों कैं यौ जॉग बे ली जा। अगर त्यर जवैं या रिशतदार छिना तब तु उनुकैं लै यां बे दूर ली जा।"

तब लूत उनर घर गो, जनर दगाड़ वीक चेलियोंक टिक-पिठांकि बात है रैछी। वील उनुधैं कौ, "उठो, यौ जॉग बे भ्यार हिटो, किलैकि प्रभु परमेश्वर यौ जॉग कैं नांश करणी छन!" लेकिन उनुल वीक बात मिं भरौस नि कर।

जस्सै उज्याव हुण लागौ दूतोंल लूत धैं कौ, "झट्ट कर आपण स्यैणि और नॉनतिनों कैं लिबेर जा, नतेरि तुम लै पापक सजा मिं यौ नगरक दगाड़ नांश है जाला।" जब लूत कैं जा - नि जां है रैछी तब दूत उकैं, वीक स्यैणि कैं और नॉनतिनोंक हात थामिबेर नगर बे भ्यार ली गेई, किलैकि प्रभु परमेश्वरक दया उनुमिं छी।

दूतोंल उनुकैं नगर बे भ्यार लैबेर कौ, "आपण प्राण कैं बचूणक लिजी भाजो और पछिन मुड़िबेर झन देखिया, और नै घाटि मिं रुकिया बल्किन सिद्द डॉन मिं भाजि जाया, नतेरि तुम लै खतम है जाला।"

लेकिन लूतल उनुधैं कौ, "महारॉजो, तुमेरि मि पर इतुक दया है रै, थ्वाड़ आजि लै करि दियो, किलैकि मी डॉनक तरफ नि जै सकन। अगर मी बाँट मिं मरि जूल तो? देखो यां नजिक मिं एक नानू-नॉन गौं छु, तुम हमुकैं वां जाण दियो।" दूतल लूत धैं कौ, "ठिक छु, तु वां जा। हम उकैं नांश नि करुंल। लेकिन ऐल यांबे झट्ट जाओ। जब तलक तुम वां नि पुजला तब तलक हम के नि करि सकन।" (उ बखत बे उ गौं नाम "सोअर" पड़ौ, जैक अर्थ छु "नॉन"।)

तब लूत और वीक नॉनतिन सोअर नगर मिं पुर्जी, लेकिन लूतकि स्यैणिल पछिल मुड़िबेर चा और उ लूणक खंभ बणि गई।

तब प्रभु परमेश्वरल अगांश बे सदोम और गमोरा नगरों मिं द्योक चारि गंधक और ऑग बरसा। इसिक प्रभु परमेश्वरल सदोम और गमोरा नगरोंक मैस, जानवर और हरेक चीजों कैं नांश करौ।

उ दिन राति पर इब्राहीम झट्ट उठिबेर उ जाँग मिं गो जां उ प्रभु परमेश्वरक सामण ठाँड़ है रौछी।

वील सदोम-गमोरा नगरोंक तरफ नजर डाली और देखौ कि अरे! भौत जादेधुड धरति बे मेलि उठूणौछि। पर परमेश्वरल इब्राहीम धैं करी वैद याद धरिबेर लूत कैं बचै ले।

इसहाकक जनम

(उत्पत्ति २१:१-७)

तब जस परमेश्वरल साराक लिजी कैं रॉखछी, उसै करौ। सारा अड-भारि है। परमेश्वरल जो बखत साराक लिजी ठैरै रॉखछी, ठिक उ दिनै वील इब्राहीमक च्यल कैं जनम दे। इब्राहीमल आपण उ च्यलक नाम इसहाक धरौ, यैक मतलब छु "उ हसुं"।

साराल कौ, "परमेश्वरल मिंकैं खुशि करि है और जो जो यौ खबर सुणाल, उ लै म्यर दगाड़ खुशि है जॉल। कवे लै यौ नि सोचछी कि मी इज बणूलि, लेकिन फिर लै मील आपण बुड इब्राहीम कैं एक च्यल दी हैलौ।"

जब इसहाक आठ दिनक हौ तब उ दिन इब्राहीमल परमेश्वरक हुकुमक अनुसार वीक खतना करौ। उ बखत इब्राहीम सौ सालक छी।

हाजिरा और इश्माएलक निकाली जाण

(उत्पत्ति २१:८-२१)

जब इसहाक ठुल-ठुल हुण लागौ तब वीक दूध छुटूण पर इब्राहीमल सबों कैं भलौ खाँण खवा। उदिन साराल आपण मिस्री नौकराणि हाजिराक च्यल

कैं, जकैं हाजिराल इब्राहीम बे जनम दे, आपण च्यल कैं तंग करण देखौ। यैक लिजी साराल आपण बैग धैं कौ, "यौ नौकराणि और यैक च्यल कैं यांबे निकालि दियो, किलैकि यौ नौकराणिक च्यल म्यर च्यलक दगाड़ वारिस नि बणि सकन।" आपण च्यल इश्माएलक बारि मिं यौ सुणिबेर इब्राहीम कैं भौत नक लागौ। लेकिन परमेश्वरल उधैं कौ, "तु उनर बारि मिं परेशान नि हो और जस सारा कूं, उस कर किलैकि त्यर वंश इसहाकक जरियल चलल। लेकिन मी तेरि नौकराणिक च्यलक जरियल लै एक देश कैं बणूल, किलैकि उ लै त्यर च्यल छु।"

दुसर दिन इब्राहीमल रात्ति पर हाजिरा कैं र्वट, पाणि और वीक च्यल दिबेर उकैं विदा करौ, और हाजिरा वांबे जैबेर बेशेबाक रेगिस्तान मिं पुजी। जब उनर पाणिक थैल खतम है गोय और उकैं दूर-दूर तलक चाणक बाद लै कैं पाणि नि मिल, तब वील समझौ कि आब म्यर च्यल मरुं। और तब उ उकैं एक बुज मिं छोड़िबेर, आपुं पलि-पलि बैठिबेर डाड़ मारण लागी, किलैकि उ आपण च्यल कैं आपण आँखोंक सामण मरण नि देखि सकछी। जब परमेश्वरल हाजिराक च्यलक डाड़ मारण सुणौ, तब उनर एक दूतल स्वर्ग बे हाजिरा धैं पुछौ, "तुकैं के परेशानी छु? तु बिल्कुल नि डर, किलैकि त्यर च्यलक डाड़ मारण परमेश्वरल सुणि है। यैक लिजी जा और आपण च्यल कैं चुप करा किलैकि मी उकैं एक ठुल देशक कुल पिता बणूल।" तब परमेश्वरल हाजिरा कैं एक पाणिक छ्वाय दिखा, और वील वांबे आपण च्यल कैं पाणि पिवा।

जस-जस इश्माएल ठुल हुण लागौ उस-उस परमेश्वर वीक देखभाल करछी, और उ एक बढ़िया-बढ़ि शिकारि बणौ। उ पारान नामक रेगिस्तान मिं रुण लागीं, और हाजिराल इश्माएलक ब्या एक मिस्री चेलिक दगाड़ करौ।

परमेश्वर इब्राहीमक इम्तिहान लिणई

(उत्पत्ति २२:१-१९)

यौ बातोंक बाद परमेश्वरल इब्राहीमक विश्वासक इम्तिहान लिणक बारि मिं सोचौ। यैक लिजी परमेश्वरल उधैं कौ, "इब्राहीम, इब्राहीम, तु आपण एकलौत च्यल इसहाकक जकैं तु भौत प्रेम करछै उकैं लिजैबेर म्यर लिजी मोरिय्याह देश मिं बलिदान करिये, जां मी तुकैं बतूल।" यैक लिजी दुसर दिन इब्राहीमल रात्ति पर एक गधा मिं बलिदानक लिजी लाकाँड़ धरीं,

और इसहाकक दगाड़ द्वी दासों कै लीबेर मोरिय्याह देशक तरफ गो।

तीन दिन हिटणक बाद इब्राहीमल दूर बे उ जाँग देखी जां उं जाणाछी। तब इब्राहीमल नौकरों धैं कौ, "तुम यां रुकिया। मी और इसहाक वां जैबेर परमेश्वरक अराधना करनू। फिर हम बाद मिं वापिस ऊंल।" इब्राहीमल बलिदान चढूणक लिजी लाकाँड़ इसहाकक काँन मिं धरीं, और उ चक्कू और आँग लीबेर आपण च्यलक दगाड़ गो।

इसहाकल आपण बौजू धैं कौ, "मी आँग और लाकाँड़ तो देखणयूं, लेकिन बलिक बकरक काँ छु।" इब्राहीमल कौ, "च्यला, बकरक पाँठक इंतजाम परमेश्वर आफी कराँल।" यौ बात करन-करनै उं द्विवै उ जाँगक तरफ गेई।

वां पुजिबेर उनुल एक वेदी बणै। और वीमिं लाकड़ लगाई। फिर वील आपण च्यल कैं बादिबेर वेदीक मांथि मिं धरि दे।

जस्सै इब्राहीम चक्कू निकालिबेर आपण च्यल कैं काँटणक लिजी बटी रौछी, उस्सै प्रभु परमेश्वरल इब्राहीम कैं स्वर्ग बे धात लगैबेर कौ, "इब्राहीम, इब्राहीम, तु आपण च्यल कैं नि काँट, और उकै के लै प्रकारकि चोट नि हांड। किलैकि मील देखि है कि तु म्यर आदर करछै, और म्यर हुकुम बारबर मानछै। मील देखौ कि तु आपण एक मात्र च्यल कैं लै म्यर हुकुमक पालनक लिजी काँटण हुं तैय्यार छै।" इब्राहीमल पछिल कैं चा और वील एक भेड़ कैं देखौ जो एक बुज मिं अटक रौछी। इब्राहीम उकैं निकालिबेर ला और आपण च्यलक बदाव मिं काटि दे। यैक लिजी इब्राहीमल उ जाँगक नाम "प्रभु इंतजाम करनी" धरौ।

तब प्रभुल इब्राहीम कैं दुसर बार धात लगैबेर कौ, "तु म्यर लिजी आपण च्यल कैं काँटणक लिजी तैय्यार छियै जो त्यर यककै च्यल छी। यैक लिजी मी परमेश्वर कसम खांनू कि मी तुकैं भौतै आशीश द्यूल। मी तुकैं इतुक वंशज द्यूल जतुक अगाशक तौर, यौ इतुक जादेक है जौल जतुक समुद्रक किनौरक बउवक चुरमुर। यैक अलावा त्यार नॉनतिन आपण दुश्मणों कैं लै हरौल। धरतिक सब देश त्यर परिवारक जरियल आशीश पाल। मी यौ सब यैक लिजी करुल किलैकि त्वील म्यर हुकुम मानौ।"

वीक बाद इब्राहीम और इसहाक आपण दासोंक दगाड़ बेशेबा वापिस आई जां उं रुछी।